



Provediment da la sanadad en Grischun

■ **(anr/fa) Il chantun propona in model directiv per procurar ch'il provediment da la sanadad en Grischun resguardia tut las regiuns e saja era pajabel. Deputà Philipp Gunzinger e 68 collegas vulessan savair detagls.** Dacurt ha preschentà il departament per giustia, segirezza e sanadad il «model directiv per l'organisaziun dal provediment da la sanadad en Grischun». A maun da tschintg mesiras prevesa il chantun da segirar che quel provediment saja pajabel e cumpiglia tut las regiuns dal Grischun. Quest model directiv ha tramess il departament respunsabel «a blers adressats cun la finmira ch'i dettia ina discussiun surlonder en las regiuns e tar il public interessà». Il deputà *Philipp Gunzinger* (pld, Suot Tasna) che presidiescha la direcziun dal Cen-

ter da sandà da l'Engiadina Bassa e 68 ulteriuras deputadas e deputads al cusseg grond han inoltrà a chaschun da la sesiun da december ina dumonda davart quest model directiv. Els dumondan la regenza co ch'i sajan stadas las emprimas reacziuns a las tschintg mesiras dal model directiv e cura ch'i saja previs da realisar questas mesiras. Co sa preschenta il stadi actual dal svilup vers centers da sanadad en las singulas regiuns, il qual vegn promovì e sustegnì da vart dal chantun? è in'ulteriura dumonda dals deputads. Philipp Gunzinger accentuescha ch'el saja persvas che la strategia definida en il model directiv chantunal saja «la dretga via per garantir a lunga vista in bun provediment da la sanadad en tut las regiuns dal Grischun».